



## საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

### „ვაზიანი“



„ვაზიანი“ (სააქციო საზოგადოება), ალკოჰოლური სასმელების მწარმოებელი კომპანია, დაარსდა 1982 თბილისში როგორც „სამტრესტის“ სუვენირულ ნაკეთობათა კომბინატი (უშვებდა სუვენირულ ბოთლებში ჩამოსხმულ ღვინოს, კონიაკსა და არაყს), რ-იც 1989-იდან სამრეწვ.-კომერციულ ფირმად გადაკეთდა და ეწოდა „ვაზიანი“. 1992-იდან კი ჩამოყალიბდა როგორც სააქციო საზ-ბა „ვ.“ უშვებდა

32 დასახელების სხვადასხვა ასორტიმენტის პროდუქციას: ნატურალურ ღვინოს, კონიაკს (ბრენდი), არაყს და ცქრიალა ღვინოს. მისი წლიური ბრუნვა 3 მლნ. ბოთლს შეადგენდა. ქ-ნა ალჭურვილი იყო უახლესი ტიპის მანქანა-დანადგარებით. კომპანია კახეთში (თელავი) ფლობდა ღვინის პირველადი გადამუშავების ქ-ნას და ვენახებს. ნედლეულს ღებულობდა აგრეთვე საქართვე. სხვა რეგიონებიდანაც ვაზის ადგილწარმოშობის მიხედვით. ღვინის ჩამოსხმა ხდებოდა როგორც ბოთლებში, ისე სხვადასხვა ტევადობის კერამიკულ დოქებში. კომპანია კონიაკის ერთ-ერთი ძირითადი მწარმოებელი იყო საქართველოში. „ვ-ს“ ჰქონდა რამდენიმე ასეული ათასი დკლ ტევადობის სპირტსაცავი (ორხევში), სადაც ინახავდნენ სა-კონიაკე სპირტს სამარკო და ორდინარული კონიაკების დასამზადებლად. „ვ-ის“ მიერ დამზადებული კონიაკებიდან განსაკუთრებული გემოთი და ხარისხით გამოირჩეოდა: „არაგვი“, „გრემი“, „ვარციხე“, „ენისელი“, „თბილისი“. ცქრიალა ღვინოებიდან აღსანიშნავი იყო „სამეფო“ და „ოქრო“. საწარმოს მიერ გამოშვებული პროდუქციის 80% საექსპორტოდ იგზავნებოდა დსთ-ის ქვეყნებში, კანადაში, აშშ-ში, პოლონეთში, ბელგიაში, გერმანიაში და სხვ. „ვ-ის“ პროდუქციას საერთაშ. გამოფენებზე მიღებული ჰქონდა 5 ოქროს, 7 ვერცხლის და 4 ბრინჯაოს მედალი. 2004 წ. ქ. ოდესაში (უკრაინა) გამართულ ალკოჰოლური სასმელების საერთაშ. გამოფენაზე ცქრიალა ღვინო

„სამეფომ“ მიიღო გრან-პრი. 2012 კომპანიაში მოხდა რეორგანიზაცია და იგი დაიშალა რამდენიმე შპს-დ. „ვ-ის“ სამართალმემკვიდრე გახდა შპს „ვაზიანი კომპანი“, რ-იც ფლობს სრული ციკლის უახლესი ტექნიკით აღჭურვილ ახალ ღვინის ქ-ნას თელავში (აშენდა 2013). ქ-ნის საპროექტო სიმძლავრე 3 მლნ. ბოთლია წელიწადში. უშვებს 22 დასახელების როგორც თეთრ, ისე წითელ ღვინოს წლიურად საშუალოდ 1,5 მლნ. ბოთლის ოდენობით. პროდუქცია გადის საექსპორტოდ ესტონეთში, ლატვიაში, ლიტვაში, პოლონეთში, რუსეთში, უკრაინაში, ყაზახეთში, ჩინეთში და ა. შ.

**ლ. აბრამიშვილი**

---